

## Akili Zilizojawa na Ahadi za Mungu

*Kwa maana kwa moyo mtu huamini hata kupata haki, na kwa kinywa hukiri hata kupata wokovu—Warumi 10:10.*

**K**ulingana na hili, kuna kitu cha kuamini, pia kitu cha kukiri. Lazima moyo uukubali ukweli kwanza kama ulivyo katika Yesu. Huu ndio msingi wa dini ya kweli. Unaanza kuhisi hatia ya dhambi; nafsi iuguwayo ugonjwa wa dhambi, inahisi hitaji lake la tabibu, inakuja kwa Yesu wa Nazareti kwa ajili ya kusamehewa. Anapoanza vita dhidi ya adui, anamtegemea Yesu ili apate nguvu za kushinda majaribu. Anakesha na kuomba huku akiyachunguza Maandiko.

Kweli za Biblia zinaonekana katika nuru mpya na ya kupendeza sana na Roho wa Mungu anamfungulia umuhimu wake wa dhati. Anajifunza maisha ya Yesu na anavyozidi kutambua kwa uwazi usafi usio na doa wa tabia ya Mwokozi, anashindwa kutumainia wema wake mwenyewe; na anavyozidi kumtazama Yesu kwa utulivu na kwa ukaribu, anakosa kuona ukamilifu ndani yake mwenyewe. Kujihesabia haki kwake kunatoweka na anaanguka, akiwa hajiwezi na kuvunjika juu ya Mwamba, Kristo Yesu. Anaweza kusongwa sana na mjaribu na kwa muda fulani anaweza kuwa na hisia za kukatisha tamaa, na kujaribiwa kufikiri kwamba Mungu hatampokea; lakini, akimwamini Mungu katika Neno Lake na kuomba ahadi Zake za hakika, anaendelea mbele katikati ya giza hata kufika katika nuru angavu ya upendo wa Yesu.

“Na kwa kinywa hukiri hata kupata wokovu.” Ikiwa moyo ni nyumba ya hazina ya kweli ya neema na upendo wa Kristo, hili litaoneshwa katika maneno na mwenendo. Kutakuwa na mvuto daima kwa Yesu. Wote watajaribiwa; hivyo kuna uhitaji wa neema ya Mungu na wa imani na kanuni thabiti za kidini. Midomo inapaswa kutakaswa kiasi kwamba maneno yanayotamkwa yanaweza kuwa machache na yaliyochaguliwa vyema.

Mara nyingi wanaodai kuwa Wakristo wanajiletea juu yao wenyewe udhaifu mkubwa wa kiroho kwa kudumu katika majaribu na malalamiko yao. Sio tu kwamba jambo linakuzwa kila mara linaporudiwa, bali wanatengwa mbali na Yesu kwa uhakika wanaporuhusu wao wenyewe kuasi katika jambo hili. Shetani anatafuta kuvuta fikra zao kwao wenyewe na kukaza juu yao wazo kwamba hawapokelewi. Wanaanza kujihurumia na kujisikitikia wenyewe na kupoteza imani na tumaini katika Yesu; na kama matokeo yake wanatanga mbali na Yule ambaye anawataka kumtwika Yeye mizigo yao.

Kwa hao tungewaambia, hadithia yale ambayo Mungu amekufanyia. Mwambie Shetani kwamba hauitumainii haki yako mwenyewe, bali haki ya Yesu Kristo. Itunze akili yako ikiwa imejawa na ahadi za thamani zinazopatikana katika Biblia na pale Shetani anapokuja kama mafuriko ili kukuangamiza, kabiliana naye kwa silaha ambayo Neno la Mungu limeitoa, “Imeandikwa.” Hili litavunja mamlaka yake na kukupatia ushindi (*Historical Sketches*, 129, 130).